

四庫全書

子部

欽定四庫全書

太平御覽卷一百二十二

宋 李昉等 撰

偏霸部六

前秦苻堅

苻丕

苻登

苻堅

崔鴻十六國春秋前秦錄曰苻堅字永固健弟雄之子趙建

武中母苟氏祈子於西門豹祠歸而夜夢與神交遂孕十二月而生堅有神光之異自天燭庭背有赤文隱起成字曰舛音草付臣又土王咸陽堅秘而莫之傳也姿貌魁傑臂垂過膝目有紫光祖洪奇而愛之字曰堅頭因而謂健曰此兒頭大重鎮身長任大足短安下非常相也趙右光祿大夫司隸校尉高平徐統有知人之鑒遇堅於路異之執其手曰苻郎此官之御街小兒敢戲於此不畏司隸縛耶堅曰司隸縛罪人不縛小兒戲也統顧左右曰此兒有霸王之相後遇之統下

車謂曰苻郎當大貴但僕不及見如何堅曰若如公言不敢忘德八歲請就師學洪曰尚小未可吾年十三方欲求師時人猶以為速成汝今乃求學耶欣而許之性至孝有器度博學多才藝年十一便有經畧大志健之入闕也次于曲沃夢天神遣使者朱衣赤冠命拜堅為龍驤將軍旦而為壇於曲沃以授之健泣謂堅曰先王昔受此號汝父次為之今若汝也復為神明所命可不勉之堅既殺苻生永興元年六月去皇帝之號僭稱大秦天王即位太極殿誅董榮等二十餘人

改壽光三年為永興元年追尊父為文桓皇帝世子宏為皇太子兄清河王法為丞相東海公從祖永安公侯為太尉從兄晉公桺為尚書令諸王皆貶爵為公封弟融為陽平公雙為河南公子丕為長樂公暉為平原公熙為廣平公康為鉅鹿公李威為左僕射梁平老為右僕射席寶為丞相長史王猛為中書侍郎權翼為黃門侍郎諸公卿為生所誅者悉復本官十月丞相東海公法以疑忌賜死苟太后之意也堅性友愛與法訣于東堂慟哭嘔血二年四月堅如雍祀

五時

止音

六月如河東祀后土八月自臨晉登龍門顧謂

羣臣曰美哉山河之固權翼對曰吳起有言在德不在

險深愿陛下追蹤唐虞懷遠以德山河之固不足恃也

堅大悅至韓原觀晉魏顆鬼結草抗秦軍之處賦詩而

歸甘露元年正月起明堂禪

音善

南北郊六月甘露降乃

大赦改元八月堅下書曰咸陽內史猛言彰出納所在

著績有卧龍之才宜入贊百揆絲綸王言可徵拜侍中

中書令領京兆尹丞相鄧羌性鯁直與猛協規齊志于

是百僚肅整豪右屏氣風化大行堅歎曰吾今始知天下之有法也以猛為吏部尚書遷太子詹事左僕射猛辭堅曰卿尤屬明哲朝野所望豈容致辭所舉融等尋別銓授以苻融等為侍中中書監右僕射任羣為光祿大夫領太子家令朱彤為中書侍郎領太子庶子三年九月鳳皇集于東閣大赦境內初將為赦與左僕射猛右僕射融密議於露堂悉屏左右堅自為赦文猛融進紙筆有一大蒼蠅入自牖間鳴聲甚大集于筆端驅而復來

堅惡之久而乃去俄而長安街巷市里民相告曰官今
大赦有司以聞堅驚謂融猛曰事何從而泄於是勑外
推窮之咸言有一小人衣黑大呼於市曰官今大赦須
臾不見堅嘆曰其何蒼蠅乎聲狀非常吾固惡之四年
七月黃龍見於成紀梁山崩五年白虎見天水六年遣
鴻臚拜張天錫為大將軍涼州牧西平公建元元年正
月雍州秀才段鏗對策上第拜吏部郎中孝廉通經者
十餘人皆拜令長五年六月晉大司馬桓溫伐燕次于

枋方頭燕師屢敗遣散騎侍郎樂嵩乞師于堅請割虎
牢以西之地八月遣將軍苟池潞州刺史邵羌帥步騎
救燕溫敗歸是月京兆尹王攸上書獻十畧一曰君道宜
明二曰臣尚忠敬三曰子貴孝養四曰民生在勤五曰
教無偏黨六曰養民在惠七曰延聘耆賢八曰懲惡顯
善九曰伐叛討逆十曰易簡弘大堅納之以攸為諫議
大夫十一月燕車騎吳王垂來奔桓溫既走慕容暉音
悔割河洛之地以賂秦乃曰行人失辭分災救患理之

常也堅大怒六年令輔國王猛帥鎮南楊安虎牙將軍

張蚝

音次

建節鄧羌等步騎六萬討平燕冀八月猛攻宛

壺關賾遣太傅上庸王評等帥四十萬屯於潞川猛覘

且艷切知評賣水鬻薪不撫將士有可乘之會大笑謂

覘候也楊安等曰慕容評真奴才雖億兆之衆尚不足為慮况

數十萬乎今破之必矣甲子陳於渭原猛誓衆曰王景

畧受國厚恩任兼内外今與諸君深入賊地宜各勉進

不可退也受爵明君之朝慶觴父母之室不亦美乎衆

皆勇奮破釜棄糧大呼競進猛望評師之衆惡之謂鄧
羌曰今日之事非將軍莫可以捷也成敗之機在斯一
舉將軍其勉之羌曰若以司隸見與者公無以為憂猛
曰此非吾所及也必以安定太守萬戶侯相處羌不悅
而退俄而兵交猛召羌寢而不應猛乃馳就許之於是
大飲帳中與張蚝徐成等跨馬運矛馳入評軍出入數
四傍若無人寥音懇又居輦切舉也旗斬將殺傷甚衆戰及日中
燕敗績進圍鄴堅帥精銳向鄴七日至安陽過舊閭引諸耆老

語及祖父舊事泣然流涕乃停信宿猛潛如安陽迎堅
堅謂之曰昔亞夫不出軍迎漢文將軍何以臨敵而背
衆乎猛曰臣每覽亞夫之事常謂前却人主以此而為
名將竊未多之臣奉陛下神算擊垂亡之虜若摧枯拉
攢
朽何足憂也戊寅剋鄴慕容暉出奔將軍郭慶執暉
於高陽送之辛巳堅入鄴宮大赦閱其圖籍凡郡百五
十七縣一千五百七十九戶二百四十五萬八千九百
六十九口九百九十八萬七千九百三十五以王猛為

使持節都督關東六州諸軍事車騎大將軍開府儀同
三司冀州牧鎮鄴封清河郡侯以偽太宰恪太傅評之
第盡賜之加美妾五人上女妓十人中妓人三十人猛
辭堅曰昔魏絳和戎猶有金石絲竹之賞山甫翼周實
受四牡之錫卿功超二子任過管葛安得辭也其敬受之
無逆朕命以鄧羌為散騎常侍安定太守真定郡侯邑
三千戶賞潞川之功七年七月七日堅如洛陽下書曰士死
知己猶來格謨故喬公一言魏祖追慟趙司隸高平徐

統往在鄴都識朕於童稚每思其殷勤之言弗敢忘也可召其子孫詣行在所八年五月以高平徐攀為鄆郡太守攀統之少子以舊恩拔之也六月冀州牧猛入為丞相中書監司隸校尉猛固辭丞相改授司徒又固辭不拜乃停司徒之授九年四月天鼓鳴鼙出於箕尾長十餘丈或名蚩尤旗經太微掃東井自夏及秋冬不滅太史令張猛言於堅曰尾燕之分野東井秦之分野今鼙起箕尾而掃東井十年後燕滅秦之象二十年後燕當為代

所滅慕容暉父子兄弟亡虜也而布列朝廷貴戚莫二
宜除渠帥以寧皇秦若旦誅鮮卑不夕滅彗星者臣請
就妖言之戮堅不納更以暉為尚書垂為京兆尹冲為
平陽太守十年三月侍中太尉李威卒威字伯龍漢陽人苟
太后姑子少與苻雄結刎頸之交苻生屢欲誅堅賴威
以免堅深德之事威如父誅苻生及法皆威與太后潛
決大謀遂有辟陽之寵雅重王猛勸堅以國事任之堅
嘗謂猛曰李公知卿猶鮑叔之於夷吾罕虎之於子產

猛兄事之夏四月堅下書曰巴夷嶮逆寇亂益州招引

吳軍為唇齒之勢特進鎮軍將軍護羌校尉鄧羌可帥甲

士五萬星夜赴討五月蜀人張育楊光等起兵二萬以

應巴獠音老晉威遠將軍桓石度帥衆二萬入據墊音江

張育自號蜀王稱藩于晉八月鄧羌敗晉師于涪音浮西

擊張育楊光等於綿竹皆斬之益州平羌勒銘于岷山

而還十一月羌至自成都堅引見東堂謂之曰將軍之

先仲華遇漢世祖於前將軍復逢朕於後何鄧氏之多

幸羌曰臣常謂光武之遇仲華非獨仲華之遭光武堅笑曰將軍蓋以自况匪直將軍之幸亦朕之遇賢也十一年正月以安車蒲輪徵隱士樂陵王勸為國子祭酒堅雅好文學英儒畢集純博之精莫如勸也終于太子少傅五月王猛寢疾堅親祈南北郊宗廟社稷分遣使臣禱河岳諸神無不周備以猛少瘳赦殊死七月堅臨省疾問以後事猛曰晉僻處吳越乃正朔相承臣歿之後願不以晉為圖鮮卑羌虜我之仇讐終為大患宜漸除之以

便杜稷言終而卒時年五十一堅哭之慟謂太子宏曰
天不欲使吾平一六合何奪吾景畧之速也贈侍中丞
相餘如故謚武侯朝野巷哭三日十二年正月癸巳高
陵民穿井得龜大三尺六寸背有八卦文命太卜池養
之食之以栗四月堅下書曰涼州刺史張天錫雖稱藩
受位而臣道未純可使步兵校尉姚萇等自石城津伐
天錫天錫率勁勇五萬來拒戰于赤岸涼師大潰天錫
率騎數千奔還姑臧致牋請降于萇甲午大軍至姑臧

天錫乘素車白馬面縛昇櫬降于軍門長釋縛焚櫬送之長安諸郡縣悉降涼州平九月以梁熙為持節西中郎將涼州刺史鎮姑臧徙豪右七千餘戶於關中封天錫重光縣之東寧鄉二百戶號歸義侯拜北部尚書遷右僕射初萇等將征天錫堅為其立第於長安至是而居之十三年太史奏有星見於外國之分當有聖人入輔中國得之者昌堅聞西域有鳩摩羅什襄陽有釋道安並遣求之十七年正月不雨至于六月撤樂減膳出

宮女以迎和氣八月堅收起居注及著作所錄而觀之見苟太后李威之事慙怒乃焚其書著作郎董裴一作雖

裴

更書時事然十不留一十八年三月徙鄴銅馳銅馬飛廉翁仲于長安十月堅引羣臣於太極殿議曰東南一隅未賓王化今欲起天下兵討之計其精卒九十七萬吾將先啟行薄伐南裔此行也朕與陽平公之任非諸將之事左右僕射權翼沙門道安陽平公融尚書石越等上書面諫前後數十堅不納十九年晉車騎桓沖率衆

十萬攻襄陽遣其前將軍劉波攻沔北堅大怒遣其子
征南鉅鹿公獻冠軍慕容垂左衛毛當等將步卒五萬
救襄陽堅下書曰吳人敢恃江山屢寇王境宜時進討
以清宇內便可戒嚴速脩戎備發公私馬人十丁遣一
丁門在灼然者為崇文義從朕將登會稽復禹績伐國
存君義同三王其以司馬昌明為左僕射謝安為吏部尚
書桓沖為侍郎勢還不遠可並為起第八月戊午遣征
南大將軍陽平公融驃騎將軍張蚝撫軍大將軍高陽公

方衛軍梁成平南慕容暉冠軍慕容垂步騎二十五萬
為前鋒甲子堅發長安戎長戎卒六十餘萬騎二十七
萬前後千里九月堅至項城涼州之兵始達咸陽蜀漢
之軍順流而下幽冀之衆至于彭城東西萬里水陸齊
進融等攻壽春晉遣都督謝石徐州刺史謝玄豫州刺
史桓伊水陸七萬敗堅于肥水堅為流矢所中單騎遁
還于淮北顧謂夫人張氏曰朕若用朝臣之言豈見今
日之事耶當何面目復臨天下乎潛然流涕堅諸軍悉

潰惟慕容垂一軍獨全比至洛陽百官威儀軍容粗備
未及闋而垂有二志說堅請巡撫燕代并求敗慕容堅許
之權翼固諫以為不可堅不從至自淮南次于長安東
之行宮入告罪於太廟丁零翟斌反于河南長樂公苻
丕遣慕容垂及苻飛龍討之垂南結丁零殺飛龍盡坑
其衆垂引丁零烏丸之衆二十餘萬為飛梯地道以攻
鄴城慕容暉弟泓先為北地長史聞垂攻鄴亡命奔關
東收諸馬牧鮮卑衆至數千還屯華陰暉乃潛使諸弟

及宗人起兵于外堅遣將軍強永率騎擊之為泓所敗
泓衆遂盛自稱大都督雍州牧濟北王推叔父垂為丞
相大司馬冀州牧吳王堅謂權翼曰吾不從卿言使鮮卑
至是關東之地吾不復與之爭將若泓何翼曰寇不可
長慕容垂正可據山東為亂不暇近逼今曄及宗族種類
盡在京師鮮卑之衆布於畿甸實社稷之憂宜遣重將
討之堅乃以廣平公熙鎮蒲坂苻叡為都督配兵五萬
姚萇為司馬討泓于華澤平陽太守慕容冲起兵河東

有衆二萬進攻蒲阪堅命竇衝討之苻叡勇果輕敵戰敗于華澤被殺堅大怒長懼誅遂叛竇衝擊于慕容冲于河東大破之冲奔于泓泓衆至十萬遣使謂堅曰秦師傾敗將興復大燕吳王已定閩東可速資偹大駕奉送家兄皇帝返鄴都與秦以虎牢為界分王天下堅大怒召暉責之暉叩頭流血陳謝堅叱之曰此自三豎之罪非卿之過復其位待之如初命暉以書招諭垂及泓冲使息兵還長安怒其反叛之罪而暉遣使謂泓曰今秦數

已終當不復能久立吾既籠中之人必無還理勉建大業以興復為務泓于是進向長安改年曰燕興堅率步騎二萬討姚萇于北地姚萇率衆七萬來攻堅為萇所敗聞慕容冲去長安二百餘里引師而歸使苻方戍驪山拜苻暉都督中外諸軍事配兵五萬拒冲暉師敗績堅又以尚書姜宇與苻琳率衆三萬擊冲于灞上為冲所敗宇死之琳中流矢冲遂據阿房城進逼長安堅登城觀之歎曰此虜何從出也吾不用王景畧陽平公之言使白虜敢至于此長樂

公苻不在鄴糧竭馬又無草削松木而食之會丁零叛慕容垂引師去鄴始具之西問長安危逼乃遣從弟求救于謝玄二十一年慕容冲僭稱尊號于阿房改年更始冲率衆登城堅身負甲胄督戰拒之飛矢滿身流血破體時雖兵寇危逼馮翊諸堡壁猶有負糧冒難而至者多為賊所殺先是謠言堅入五將久長得堅乃留太子宏守長安謂之曰脫如謠言天或專余留汝兼總戎政勿與賊爭利吾當出隴收兵運糧以給汝乃自將與張夫人中山公詵率騎數百出如五將

山六月太子宏尋將母妻宗室男女數千騎出奔冲入
據長安堅至五將山姚萇遣將軍吳忠圍之堅衆奔散
獨侍御十數人而已神色自若坐而待之召宰人進食
俄而忠至執堅以歸新平縣幽之別室萇求傳國璽于堅
曰萇次膺符歷可以為惠堅瞋目叱之曰小羌乃敢于
逼天子豈以傳國璽授汝羌乎五胡次序無汝羌名違
天不祥其能久乎璽已送晉不可得也萇又遣右僕射
尹緯說堅求為堯舜禪代之事堅曰姚萇叛賊柰何擬

之古人因問緯曰卿于朕朝作何官對曰尚書令史堅嘆曰卿宰相才王景畧之流而朕不知卿亡也不亦宜乎八月謚堅于新平佛寺中時年四十八張夫人中山公訖等皆自殺三軍莫不哀慟長欲匿殺堅之名乃謚為莊烈天王長樂公稱號偽謚堅為世祖宣昭皇帝初太子之奔也假道歸晉歷位輔國將軍桓玄篡位以為梁州刺史晉書曰堅在位十七年

苻丕

崔鴻十六國春秋前秦錄曰苻丕字永叙堅之長庶子少而聰慧好學堅與之言將畧嘉之才幹亞于苻融為將善收士卒情出鎮于鄴東夏安之堅敗歸長安丕為慕容垂所逼自鄴奔枋頭建元二十一年丕率衆二萬復入鄴城將收兵趙魏西赴長安會平州刺史苻冲帥幽并人衆擊慕容垂頻為垂將平視等所敗乃率衆三萬進屯壺闕使招丕丕乃去鄴帥兵六萬如潞川驃騎將軍張蚝并州刺史王騰迎之入據晉陽始知長安不守

堅為姚萇所殺乃舉哀于晉陽僭即皇帝位于晉陽南立
堅行廟大赦改建元二十一年為太安元年九月置百
官是月安西呂光自西域還師二年正月慕容垂僭稱
尊號二月慕容冲左將軍韓延殺冲立段隨為燕王改
年昌平五月丕以呂光為車騎將軍梁州牧酒泉公是
月姚萇僭稱尊號氐有啖青者謂諸將曰狄道長苻登
雖王室屬疎而志畧雄明請共立之以赴大駕于是推
登為持節使都督隴右雍河二州牧率衆五萬東下隴

右據南安馳使請命八月丕以登為征南大將軍開府
儀同南安王持節及州牧都督皆因其所稱而授之九月丕下
書曰鮮卑慕容永我之騎將首亂京畿禍傾社稷其遣丞相
王永帥禁衛虎旅夾而攻之十月與慕容永戰于襄陵
王師大敗丕懼帥騎數千南奔東垣晉揚威將軍馮該
自陝邀擊斬之送丕首于江東苻登稱尊號謚為哀平

皇帝

苻登

崔鴻十六國春秋前秦錄曰苻登字文高丕之族子父
敵太尉司馬登少勇有壯氣建元元年拜殿中將軍遷
羽林監長安令坐事黜為狄道長太平二年與姚萇戰
于格奴坂大破之十一月丕子渤海王懿自杏城奔登
登乃具丕死問于是為丕發喪行服為壇于隴東僭即
皇帝位改太平二年為太初元年十二月立堅神主于
軍中引師而告堅神主曰今收合義族衆餘五萬星馳
覲邁直造賊庭庶上報皇帝酷愁下雪人民大憝二年

登次于瓦亭九月進據胡空堡戎夏歸之者十有餘萬姚
萇掘堅屍鞭撻無數裸剥衣裳附之以棘坎土埋之三年
登次朝鄉姚萇據武都相持累戰互有勝負萇以登戰勝
謂堅神力所助亦於軍中立堅神主謂曰往年新平之
禍非萇之罪陛下假臣龍驤曰朕以龍驤建業卿其勉
之明詔昭然言猶在耳豈假手苻登而圖臣忘前征時
言耶今為陛下立神像可歸休于此勿計臣過聽臣至
誠四年正月登昇樓謂萇曰自古安有弑君反立神像

大呼曰弑君賊姚萇出來與汝決之何為枉害無辜萇
憚而不應萇自立堅神像戰未有利軍每夜驚乃斬像
首送登六年三月登自雍攻長安七月登攻新安姚萇
救之登引退八年十二月姚萇薨九年登聞萇死喜曰
姚興小兒吾將折杖以笞之于是大赦盡衆而東四月
登從六陌趣廢橋興將尹緯據橋以待之登與緯大戰
為緯所敗登單馬奔雍初登之東也留太子崇守胡空
堡崇聞登敗棄城出奔登至無歸乃奔平涼收集遺兵

入馬毛山七月興攻登于馬毛登遣子崇質于隴西鮮卑乞伏乾歸結婚請援乾歸遣騎二萬救登登引軍出迎與興戰于山南為興所敗死之時年五十二子崇奔于湟中僭稱尊號改年延初謚登為高皇帝十月崇為乾歸所逐奔于楊定與崇帥衆二萬攻乾歸為乾歸所敗崇定皆死之自苻健皇始元年歲在辛亥晉永和七年是歲歲在甲午四十四年晉太元十九年也

晉書曰登在位九始健以穆帝永和七年僭立至登

五世凡四十有四年以孝武帝太元十九年滅

太平御覽卷一百二十二

欽定四庫全書

太平御覽卷一百二十三

宋 李昉等 撰

偏霸部七

後秦姚弋仲

姚襄

姚萇

姚興

姚泓

蜀李特

李流

李雄

李期

李壽

李勢

後秦姚弋仲

崔鴻十六國春秋後秦錄曰姚弋仲南安赤亭羌人也
其先有虞氏之苗裔昔夏禹封舜少子于西戎世為羌
長其後燒當雄于洮罕之間當七世孫填虞虞九世
孫遷船率種人內附漢朝嘉之假冠軍將軍西羌校尉歸
順王處之于赤亭船立孫柯迴為魏鎮西將軍綏戎校尉

西羌都督廻生弋仲少而聰猛英果雄毅永嘉之亂戎
夏襁負隨之者數萬自稱雍州刺史護羌校尉扶風公
劉曜以弋仲為平西將軍石虎廢石弘自立弋仲稱疾
不賀虎累召之乃赴太寧元年拜侍中征西大將軍石
祗稱尊號於襄國以弋仲為右丞相石祗為劉顯所殺弋仲
乃與燕連和有子四十二人常誡諸子曰我死之後汝
歸晉家竭盡臣節乃使使降晉晉永和七年拜弋仲使持
節六夷大都督督江淮諸軍事儀同三司大單于封高

陵郡公八年薨時年七十三後弋仲柩為苻生所得生以王禮葬之于天水長稱尊號追謚景元皇帝廟號始祖陵曰高陵

姚襄

崔鴻十六國春秋後秦錄曰姚襄字景國弋仲第五子雄武多才藝能明察善撫納士民愛敬之咸請為嗣仲以襄非長不許石祗僭號以襄為使持節驃騎將軍護烏丸校尉晉遣使拜襄持節平北將軍并州刺史即丘縣

公弋仲薨率戶六萬南至滎陽晉處襄于譙城遣五弟
為任單騎渡淮見豫州刺史謝尚一面交欵便若平生
揚州刺史殷浩憚其威名遣謝萬討襄襄逆擊破之鼓行
濟淮屯于盱眙上音吁眙音怡朝廷大震襄方軌引北自稱大
將軍大單于據許昌自許遂攻洛陽踰月不克晉征西
大將軍桓溫自江陵伐襄襄與溫戰於伊水北為溫所
敗襄奔還洛陽率數千騎奔於北山百姓隨襄者四千
餘戶襄尋徙北屈將圖關中進屯杏城遣輔國將軍姚

蘭略地鄆城苻生遣苻飛拒戰襄率衆西引與苻堅戰于三原為堅所殺時年二十七萇僭尊號追謚魏武王

姚萇

崔鴻十六國春秋後秦錄曰姚萇字景茂弋仲之第二十四子少聰哲多權略不脩行業凡襄為苻堅所殺萇率諸弟降于苻生苻堅以萇為揚武將軍步兵校尉潞川之戰累有殊功遷左衛將軍累授幽州刺史苻堅伐晉以萇為龍驤將軍督益梁二州諸軍事謂萇曰朕本以

龍驤建業龍驤之號未曾假人今特以相授山南之事
一以委卿堅左將軍竇衝進曰王者無戲言此將不祥之
徵也堅默然白雀元年慕容泓起兵叛堅遣子叡討
之以萇為司馬既而為泓所敗叡死之萇遣叅軍姜協
謝罪堅怒殺之萇懼奔于渭北歸者五萬餘家咸推萇
為盟主自稱大將軍大單于萬年秦王大赦改元稱制
行事二年六月慕容冲入長安司隸崔翼尚書趙遷等
數百人來奔萇聞苻堅在五將山遣驍騎吳忠率騎圍

之萇自故縣如新平吳忠執堅送之萇將求禪代堅不許慕容冲遣率騎大將軍尚書令高蓋來伐戰於新平大破之蓋率麾下數千人來降建初元年僭即皇帝位于長安大赦改年國號大秦改長安為常安追尊考弋仲為景元皇帝立妻蛇為皇后子興為皇太子秋七月萇如安定二年徙秦州三萬戶于安定八月以太子興鎮長安四年十月立社稷于長安六年大敗苻登于安定七年三月萇寢疾遣鎮東姚碩德守長安召太子興詣行在

所八年十月葬如長安至于新支堡疾篤輿疾而進十二月至長安召太尉姚旻僕射尹緯等受遺詔輔政喪曰吾氣力轉微將不能復臨天下卿等善相吾子謂興曰有毀此諸人者慎勿受之撫骨肉以仁接大臣以禮待物以信遇民以恩四者既備吾無恨矣庚子薨于永安宮年六十四謚武昭皇帝葬原陵廟號太祖

姚興

崔鴻十六國春秋後秦錄曰姚興字子畧長之太子

薨祕不發喪皇初元年乃發喪行服即位于槐里大赦改元七月如涇陽與苻登戰斬登徙陰密三萬戶於長安二年以叔父緒為晉王征西將軍碩德為隴西王弟崇為齊公顯為常山公三年以緒為并冀二州牧鎮蒲坂四年二月遣齊公崇伐洛陽弘始元年正月大赦改元冬十月赴洛陽以東平公紹為都督山東諸軍事豫州牧鎮洛陽四年五月遣大將軍隴西王碩德率步騎六萬伐呂隆于涼州先是禿狐內切沒檀據西平沮渠蒙遜據

張掖李暠據燉^音煌各制方域共相侵伐碩德從金城
濟河直趣廣武逕蒼松至隆城下隆遣弟輔國趙龍驤
邈等率衆來拒碩德大破之生擒邈僂檀遜暠蒙等各修
表奉獻九月隆奉表請降興答報嘉美以隆為鎮西將
軍涼州刺史建康公十一月鳩摩羅什至長安七年正
月興如逍遙園引諸沙門聽什說佛經九年以太子泓
錄尚書事燕王慕容超遣使稱藩十年與魏通和貢馬
千匹十一年蜀熊縱遣使稱藩十六年五月興疾于內

寢太子泓以兵屯東華門侍疾于諮詢堂尚書令廣平公弼姚弼也潛謀為亂招集數千人持兵於第興疾損升前殿百官咸會征虜劉羌泣曰陛下寢疾數旬柰何忽有斯事興曰朕過庭無訓諸子交惡含恥覲顏愧于四海興以弼文武兼才未忍致法免其尚書令以公就第

十七年十一月興疾重廣平公弼告病不朝集兵於第興怒乃收弼囚之十二月興疾甚遣收廣平公弼第甲仗還武庫於是弼黨率甲仗攻端門殿中上將軍斂曼高一作

鬼勒兵拒戰不得入遂燒端門興力疾臨前殿賜弼死丁未薨於前殿年五十一謚文桓皇帝廟號高祖墓曰偶陵

姚泓

崔鴻十六國春秋後秦錄曰姚泓字元子興之太子興薨即位大赦改元為永和元年廬于諱議堂既葬乃親庶政晉相劉裕來伐遣冠軍檀道濟龍驤王鎮惡入自淮肥二年七月劉裕次于陝城泓次于灞上裕至潼關泓自灞上還軍次于石橋裕進據鄭城泓遣姚裕屯兵

宮中將軍姚丕守渭橋泓軍于逍遙園丕為晉所敗因
丕之敗泓自赴之遂相踐而退泓與河間公裕等數百
騎出奔于石橋大將軍東平公讚聞泓之敗率諸軍赴
難會泓于石橋晉人已圍青門一云諸門軍不得入衆皆驚

散泓計無所出謀欲降于裕其子佛念年十二謂泓曰
陛下今雖降晉劉裕待人無禮終必不全願自我決憮
音武又音然不答念遂登宮牆自投而死平原公璞并州
刺史尹昭以蒲坂降晉東平讚率宗室子弟百餘人亦

降于裕裕盡殺之九月裕至長安送泓于建康市而戮
之時年三十建康百里之內草木焦死自姚萇白雀元
年歲在甲申至于是歲在丙辰三十有三歲

蜀李特

崔鴻十六國春秋蜀錄曰李特字玄休巴西宕渠人其
先廩君之苗裔秦併天下以為黔中郡薄賦歛之口歲
出錢四十巴人謂賦為賓藏宗切因謂之賓人焉及高祖
為漢王始募賓人平定三秦既而不願出關求還鄉里

高祖以其功復同豐沛更名其地為巴郡土有鹽鐵丹
漆之利民用殷阜俗性剽勇又善歌舞高祖愛其舞詔樂
府習之今巴渝舞是也其後繁昌分為數十姓及魏武
帝漢中特祖父虎將五百家歸魏魏武嘉之遷略一云洛陽

陽拜虎等為將軍內徙者亦萬餘家散居隴右諸郡及
三輔弘農所在號為巴氐虎子慕為東羌獵將慕凡有五
子輔特庠流驥特身長八尺雄武善騎射沉毅有大度
元康中氐齊萬年反關西擾亂天水略陽扶風始平諸

郡皆被兵寇民頻歲大饑流移就穀相與入漢川者數萬家特至劔閣顧盼嶮阻曰劉禪有如此之地而面縛于人豈非庸才耶同移者間或音都等咸歎異之初流民既至漢中上書求寄食巴蜀朝廷從之由是散在梁益不可禁止元康元年詔徵益州刺史趙歎音欽為大長秋以成都內史耿勝代歎歎遂謀叛潛有劉氏割據之志勝率衆入州歎遣衆迎之戰于西門勝敗走歎獲殺之歎自稱大將軍益州牧特弟李庠與兄弟及妹夫李含

任回等以四千騎歸厥厥以庠為威寇將軍使斷北道
庠素東羌之良將晚兵法部陣肅然厥惡其齊整殺之
復以特為督將特兄弟既怨厥引兵歸縣竹厥恐朝廷
討已遣長史費遠鞬音度為太守李必斷北道次綿竹之石
亭特密合得七千餘人夜襲遠軍遠軍大潰因放火燒
之死者十八九進攻成都厥聞兵至驚懼不知所為李
苾等夜斬關走文武盡散厥獨與妻子乘小船走至廣
都為其下人朱竺所殺先是梁州刺史羅尚聞厥叛上

表稱厥非雄才又蜀人不願為亂事終無成願往征之
惠帝遣尚為平西將軍益州刺史率七千餘人入蜀特
等聞尚來甚懼使其弟驥于道奉迎并貢寶物尚甚悅
冬十月六郡流人推特行鎮北將軍承制封拜其弟流行
鎮東將軍弟驥驍騎將軍少子雄為前將軍以相統領進兵
攻尚於成都尚頻為特所敗乃阻長圍緣水作營自都安
至犍為七百里與特相拒大安元年特乃自稱為大將
軍大赦改元為建初元年益州從事任明說尚曰特既

羌逆侵暴百姓今又分散人衆在諸村堡驕怠無備是天亡之時也可告諸村密刻期日內外擊之破之必矣尚從之遣大眾奄襲特營尚出逆戰到官桑特軍敗績死之雄稱成都王追謚景王及稱尊號追尊曰景皇帝廟號始祖

李流

崔鴻十六國春秋蜀錄曰李流字玄通特第四子也少好學便弓馬東羌校尉何攀稱流有貴音斧育之勇舉為

斧

東羌校尉平趙歎于成都晉朝論功拜奮威將軍封武
陽侯建初元年特既見殺流自稱大將軍益州牧九月
流疾篤謂諸將曰驍騎李驥
也高明仁愛識量多奇固足
以濟大事然前軍李雄
也英武殆天所相可共受事於前
軍以為成都王也遂薨年五十六諸將共立雄為主雄
稱尊追謚流秦文王子龍嗣

李雄

崔鴻十六國春秋蜀錄曰李雄字仲雋特第三子母羅

氏夢雙虹自門升天一虹中斷既而生蕩後羅氏沒水忽然如寐夢大蛇繞其身遂有孕十四月而生雄常言二子若有先亡在者必大貴蕩於李流時卒雄長八尺三寸美容貌相工相之曰此君將貴其相有四目如重雲鼻如龜龍口方如器耳如相望法為大貴位過三公不疑雄少以氣烈聞識者皆器重之特稱益州牧以雄鎮梓潼又拜前將軍流薨雄稱大將軍益州牧治鄆皮音城以西山范長生巖居穴處求遵養之志雄欲迎立為

君而臣之長生固辭曰推步大元五行大會甲子祚鍾于李非吾有也建興元年十月雄即成都王位於南郊大赦改元約法七章以叔父驥為太傅兄虎威為太保晏平元年三月范長生乘素輿詣成都雄迎于大門執版延坐長生請雄對坐即拜丞相尊曰范賢長生勸雄稱尊號夏六月僭即帝位大赦改年國號大武追尊父特為景帝母羅氏為太皇后十月加丞相范長生為天地太師之號封西山侯玉衡五年正月立妻任氏為皇

后八年四月范長生卒以其子侍中賁為丞相長生善天文有術數民奉之如神十四年立兄子班為太子二十四年五月雄寢疾六月丁卯薨年六十一年謚武皇帝廟號太宗十月葬安都陵太子班襲位

李期

崔鴻十六國春秋蜀錄曰李期字世運雄第四子聰慧好學弱冠能屬文雄薨班即位雄子車騎將軍越自江陽奔喪以期與班非雄所生而嗣位心不平十月因夜

哭臨越殺班於殞宮班字世文雄兄蕩第四子雄妻任
氏無子養班為子越既殺班矯太后令陳班罪狀謚戾
太子立期為主甲子期僭即皇帝位王恒元年正月大
赦改年立妻閻氏為后四月大將軍漢王壽率步騎一
萬自涪音浮向成都期不虞其至不設備至即寇城屯兵
宮門殺相國建寧王越尚書令景騫尚書田袞等廢期
為印都縣公幽之別宮期自殺年二十五謚曰幽公

李壽

崔鴻十六國春秋蜀錄曰李壽字武考特季弟驤之少子少尚禮容敏而好學雄奇其才畧以為足荷重任封為建寧王既而期立改封漢王領梁州刺史治涪城壽見期兄弟十餘人并有強兵懼不自全陰謀據成都稱藩於晉乃誓文武得數千人襲成都剋之縱兵擄掠數日乃定僭即皇帝位於南郊大赦改咸康四年為漢興元年追尊父驤為獻皇帝三年六月壽下書曰吳會遺燼久逋天誅今將大興百萬躬行明罰九月大閱軍士七

萬餘人舟師泝江而上過成都鼓譟盈江壽登城觀之
羣臣以國小衆寡吳會險遠圖之未易叩頭泣諫乃止
兵人咸稱萬歲十月饗禮于太學舉明經者封好學侯
四年以太子勢領大將軍錄尚書事六年分寧州興古
永昌雲南朱提越窩音髓河陽六郡為漢州四月壽寢疾
常見李期為祟八月薨年四十謚昭文皇帝廟號中宗
葬安昌陵

李勢

崔鴻十六國春秋蜀錄曰李勢字子仁壽之長子身長七尺九寸腰帶十四圍善于俯仰時人異之壽既薨僭即帝位大赦改元太和元年正月尊母閻氏為皇太后妻季氏為皇后嘉寧二年晉遣西將軍荊州刺史桓溫來伐勢大發軍禦之鎮東李位都逆往降溫達成都之十里陌勢衆自潰三月溫至城下縱火燒其諸城門勢衆惶懼無復固志勢乃夜開東門走九百里至晉壽然後送降文于溫勢尋輿櫬面縛軍門溫解縛焚櫬送勢

及叔父福戴記云及弟福等十餘人于建康晉封為歸義侯升

平五年卒常璩字道將蜀成都人少好學著華陽國志
十篇序開闢以來迄于李勢皆有條理云宕渠古寶國
今有寶城秦始皇時有長人長五丈見宕渠秦史胡母
敬曰五百年外地必有異人為大人者及雄之稱尊號
祖先出自宕渠有識者皆以為應之譙周云我死後三
十年當有異人入蜀又著讖云廣漢城北有大賊曰流
曰特攻難得歲在玄宮自相剋又惠帝之世蜀童謠曰

江橋頭闕下市成都北門十八字至是而應焉李特以
晉永和元年歲在辛酉起兵至勢嘉寧二年為晉永和三
年歲在壬戌而降晉合四十七年



太平御覽卷一百二十三

欽定四庫全書

子部

太平御覽卷一百二十四至

詳校官侍讀學士臣沈咸熙
員外郎臣牛穎文覆勘

總督官降調編修臣倉聖脈

校對官助教臣胡予襄

謄錄監生臣王時發

欽定四庫全書

太平御覽卷一百二十四

宋 李昉等 撰

偏霸部人

前涼張軌

張寔

張茂

張駿

張重華

張玄靚

張天錫

西涼李嵩古老切

李歛

北涼沮渠蒙遜

沮渠茂虔

前涼張軌

崔鴻十六國春秋前涼錄曰張軌字士彥安定烏氏人
漢常山王耳十七世孫祖烈魏外黃令父溫太官令母
隴西辛氏軌少好學明經與同郡皇甫士安友善拜宮
守舍人京兆杜預以其所註易遺之太康中為尚書郎
太子洗馬中庶子遷散騎常侍征西將軍司馬軌以晉

室多難陰圖保據河西追寶融故事筮之遇泰之觀軌
喜曰霸者之兆乃求為涼州公卿亦舉軌拜涼州刺史
課農桑拔賢才置崇文祭酒徵九郡胄子五百人立學
校以教之永興二年拜西安將軍封安樂鄉侯惠帝崩遣
長史北宮純司馬纂別駕陰監奉表京師是歲大城姑
臧其城本匈奴所築也南北七里東西三里地有龍形
故名卧龍城永嘉四年十一月黃龍出于臨羌河發水
昇天身長十餘丈五年帝遣使拜車騎大將軍開府儀

同三司策命未至而劉曜攻陷長安遷晉帝于平陽建
興元年晉愍帝即位于長安遣使者拜軌鎮西大將軍
開府儀同三司加侍中封西平郡公固讓不受二年進
拜太尉涼州牧以軌年老多疾拜子寔行撫軍副涼州
刺史五月軌寢疾立子寔為世子己丑薨于正寢年六
十葬建陵冊贈侍中太尉謚武穆張祚僭號追尊武王
廟號太祖

張寔

崔鴻十六國春秋前涼錄曰張寔字安遜軌之世子也
學尚明察敬賢愛士晉舉秀才除尚書郎永嘉元年固
辭驍騎將軍請還涼州帝許之改授議郎西中郎將建
興元年長史張翼等表寔嗣位十月帝遣使授西中郎
將涼州刺史西平公二年十一月帝將降劉曜進寔侍
中司空涼州牧三年始知劉曜逼遷天子平陽大臨三
日五年南陽王寶聞愍帝崩自稱晉王年號建康置百
官遣使拜寔征西大將軍開府儀同三司增邑三千戶

六年六月京兆人劉弘挾左道以眩惑百姓密與寔左右十餘人謀殺寔皆懷刀入內斬寔于外寢時年五十葬寧陵晉元帝冊贈寔大司馬涼州牧謚元公張祚僭號追尊曰明王廟號高祖

張茂

崔鴻十六國春秋前涼錄曰張茂字成遜寔之母弟虛靖好學不以勢利為心建興元年相國南陽王寶辟從事中郎又薦為給事黃門侍郎皆不就二年徵為侍中

以父疾固辭四年拜秦州刺史加散騎常侍領雍州皆不受寔左司馬陰元等以寔既被害子駿冲幼宜立長君乃推茂為大都督太尉涼州牧茂不從以平西將軍行都督涼州諸軍事護羌校尉涼州牧西平公大赦境內九月立寔子駿為世子三年劉曜遣鴻臚拜茂太師涼王四年茂寢疾執駿手泣曰吾先人以孝友見稱自漢以來世執忠順汝謹守忠節毋或失墮薨于正寢年四十八劉曜遣使贈太宰謚成烈王張祚僭號追尊曰

成王廟號太宗

張駿

崔鴻十六國春秋前涼錄曰張駿字公庭寔之世子永
嘉元年生幼而奇偉十歲能屬文茂之四年拜使持節
大都督大將軍涼州牧西平公大赦境內劉曜遣使拜
大將軍涼州牧元年正月親耕籍田二月始承晉元帝
崩問大臨三日四年十二月劉曜為賊所擒曜太子毗
及劉脩等率衆奔上邽六年二月石勒稱天王乃遣使

拜駿征西大將軍涼州牧加五錫之禮八年羣僚勸駿
稱涼王置百官駿曰此非人臣所言敢有此言罪在不
赦又請立世子乃立重華為世子十二月鄯善王元孟
獻女妹好號曰美人立賓遐觀以處之十四年五月雨
雪降霜駿避正殿素服命羣寮極言得失十五年以右
長史任處領國子祭酒立辟雍明堂而行禮焉命西曹
掾集閣内外事付索綏以著涼春秋十一月以世子重
華行涼州事十九年田于建西踰右玉縣九月改右玉

縣為金澤縣二十一年始置百官官號皆擬天朝車服旌
旗一如王者酒泉太守馬岌上言酒泉南山既崑崙之
體周穆王見西王母樂而忘歸即謂此山有石室王母
堂珠璣鏤飾煥若神宮禹貢崑崙在臨江之西即此明
矣所宜立西王母祠以裨朝廷無疆之福駿從之二十
二年六月薨于正德前殿年四十晉遣策贈大司馬謚
忠成公七月葬大陵張祚僭號追尊文王廟號世祖

張重華

崔鴻十六國春秋前涼錄曰張重華字泰臨駿第二子
寬和懿重沉毅少言駿薨右長史任處上華為使持節
大都督太尉涼州牧護羌校尉西平公假涼王大赦境
內三年九月晉遣使者拜侍中大都督隴右諸軍事大
將軍涼州刺史領護羌校尉西平公重華以位號未稱
怒不受詔羣寮上重華為丞相涼王雍秦涼三州牧五
年重華讞羣寮于閑豫庭論講經義碩問索綏曰孔子
婦誰家女老聃父字為何四皓既安太子住乎還山乎

綏曰孔子婦姓亓官氏女朋父名乾字元泉胎則無耳
一目不明孤單年七十二無妻與隣人孟壽氏老女野
合懷胎八十年乃生老子四皓還否臣尚未悉重華曰
卿不知乎四皓死于長安有四皓冢為不還山也七年
十月重華寢疾臨春坊遣左長史馬峩策拜子靈曜為
世子大赦境內十一月薨于平章殿年二十七葬顯陵
張祚僭號追謚桓王廟號世宗

張祚

崔鴻十六國春秋前涼錄曰張祚字太伯駿之長庶子
博學雄武有政治之才駿之二十一年拜延興太守封
寧鄉侯重華薨子靈曜嗣七年十一月右長史趙長等矯
稱遺令以祚為使持節都督中外諸軍事撫軍大將軍
輔政十二月趙長等議以靈曜冲幼世難未夷宜立長
君廢曜為寧涼侯立祚為大將軍護羌校尉涼州牧又從趙
長等議僭即王位于謙光殿大赦改元為和平元年立
妻辛氏為皇后子太和為太子封弟天錫為長寧侯重

華少子玄靚為涼武侯置百官二月尊祖父郊祀天地
二年有神降于玄武殿自稱玄冥與人交語祚日夜祈
之神言與福利祚甚信之征東張瓘遣兵傳檄廢祚還
第復立靈曜八月祚收瓘弟璫及其子嵩等驍騎將軍
宋混兄脩素與祚有隙祚疑之混西奔招合夷晉衆至
萬餘人還何姑臧祚大懼遣陽秋胡將靈曜于苑拉音
獵其腰而殺之埋于沙坑九月宋混次于武始大澤為靈
曜發哀閏月混至姑臧祚登神雀觀張璫張嵩殺祚守

卒死者四百餘人斬西門閨納混領軍趙長開宮門以應琚長馳入殿中大呼稱萬歲祚以長敗賊下觀勞之長奮槊朔音刺祚中額奔入萬秋閣為厨士徐里所殺以

庶人禮葬之天錫即位備禮改葬于愍陵追謚威王封子廷堅為金澤侯

張玄靚

崔鴻十六國春秋前涼錄曰張玄靚字元安重華少子母郭夫人和平二年宋混張琚等上玄靚為大將軍涼

州牧護羌校尉西平公時年七歲張瓘至姑臧推立覩
為大將軍涼王自為使持節都督中外諸軍事尚書令
涼州牧張掖郡公四年五月東苑大冢上忽有池又大
澤地燃廣袤數丈執法御史杜逸言于瓘曰此皆變之
大者可移之他族瓘徵兵數萬集于姑臧謀討宋氏混與
弟澄及左右壯士楊和等四十餘騎奔入南門申令諸
營曰張瓘得罪被太后詔誅之俄而衆至二千餘瓘率
衆出戰混擊敗之衆悉去瓘自殺混入見玄觀以混為

使持節中外都督諸軍事驃騎大將軍酒泉郡侯輔政
五年六月大旱令諸祈雨之官皆詠雲漢詩儒林祭酒
索綏曰雲漢陳周宣之美非憫旱文肯神鼎之出漢虞
丘不賀今辭與事違恐非致澤之意也綏字士艾墩煌
人父戢晉司徒綏家貧好學舉孝廉為記室祭酒母喪
去官又舉秀才著涼春秋五十卷又作六夷頌符命傳
十餘篇以著述之功封平樂亭侯六年宋混卒天錫以
使持節都督諸軍輔政八月右將軍齊南等議以欲靖

多難須立長君勸天錫自立閏月天錫遣劉肅等夜害元
靚時年十四葬平陵謚沖王

張天錫

崔鴻十六國春秋前涼錄曰張天錫字純嘏駿之少子
母曰劉美人天錫既僭即位乃謁于太廟尊母劉氏為
太后元年四月秦遣其大鴻臚拜天錫大將軍涼州牧
西平公三年姑臧北山楊樹生松葉西苑牝鹿生角東
苑銅佛生毛延興地震陷裂水出天錫避正殿引咎責

躬晉遣使拜右關中諸軍大將軍涼州牧西平公八年
郡國火燃于泥中三十所苻堅復有兼并之規天錫大
懼遣從事中郎韓博奉表于晉又與桓溫書勅以其年大
舉都會上邽十年以世子懷為使持節鎮西將軍高昌
郡公次子大豫為世子豫母焦氏為左夫人七月大水
地震西平五十日中地十動土樓崩天錫疾美人閻姬
薛姬皆自殺二姬國色並有殊寵天錫每謂之曰汝二
人將何以報我我死之後豈可更為人妻皆曰尊若不

諱妾請效死于前灑掃于地下無他志十月天錫疾瘳
大赦境內追悼二姬葬以夫人禮十三年五月苻堅遣
武衛將軍苟長等率衆來伐天錫遣中衛將軍史景等
拒戰赤岸為秦所敗天錫納左長史馬芮之言面縛降秦
東徙長安拜歸義侯北部尚書遷右僕射隨苻堅敗于
淮南又降晉為員外散騎常侍復本封薨贈鎮西將軍謚
悼公張軌以晉永寧九年辛巳歲牧涼州至天錫敗亡
之歲歲在丙午八主七十六年

西涼李嵩古老切

崔鴻十六國春秋西涼錄曰李嵩字玄威隴西狄道人也漢前將軍廣十六世孫廣子侍中敢之後李氏世為西州右姓祖父弇音前涼武衛將軍天水郡太守安世亭侯父祖宇中堅幼有令名世子侍講年十八卒嵩祖之遺腹子少而好學沉敏有器度後涼龍飛二年建康太守段業自稱涼州牧號神璽元年拜嵩效穀令二年燉煌索仙等以嵩溫毅有惠政推嵩為燉煌太守段業

復署曰高安西將軍領護西湖校尉庚子元年十一月晉昌
太守唐瑤移檄六郡推嵩為大將軍涼公領秦涼二州
牧大赦改年追尊祖弇涼景公父昶涼簡公以瑤為征東
將軍三年正月于南門起靖恭堂以議朝政圖讚自古
聖帝明王忠臣孝子烈士貞女親為序頌以作鑒戒五
年正月又立泮宮增高門學生五百人四月燉煌有葛
緣木而生作黃鳥之形世子譚卒九月立第二子歆為
世子正月大赦改年為建初元年三月謫于曲水命羣

察賦詩高親為之叙文寫諸葛亮訓厲以戒諸子十三年正月寢疾顧命長史宋繇曰吾終之後嗣子猶卿子也善相輔導二月薨于恭德殿年六十九葬建世陵謚武昭王廟號太祖初高為羣雄所推定千里之地謂張氏之業不足成河西十郡歲月而一既而傉擅入姑臧蒙遜基宇稍廣於是慨然著述志賦初河右不生楸槐張駿之世取於秦隴植之皆死至是酒泉宮西北有槐生焉乃作槐樹賦又作婦辛氏誄自餘詩賦數十篇

李歆

崔鴻十六國春秋西涼錄曰李歆字士業高第二子嵩薨左長史宋瑤等上為大將軍涼公領涼州牧護羌校尉大赦改年為嘉興元年七月歆聞蒙遜南伐西秦中外戒嚴將攻張掖尹太后以為不可宋瑤亦諫歆怒不從遂率步騎三萬東伐次于都渭澗蒙遜自浩亹來戰于懷城歆敗左右勸還歆曰吾違太后明誨遠取敗辱不殺此胡復何面目以見母也勒眾復戰敗于蓼泉為

遜所殺歆弟驍騎將軍翻擊虜將軍豫等西奔敦煌蒙
遜遂入酒泉翻及敦煌太守恂與諸子等棄敦煌奔于
北山郡人宋承張弘等以恂在郡有惠密信招恂恂率
千騎入于敦煌朱承張弘等推恂為涼州刺史蒙遜率十
二萬攻恂宋承等開門出降恂自殺恂嵩之第六子也
遜獲翻子寶徙于姑臧歲餘北奔伊吾後二十餘年至
魏太平三年寶至伊吾率流人及虜騎南襲敦煌據之
遣使降魏魏以寶為使持節侍中都督西鄯諸軍事鎮

西大將軍開府儀同三司領護戎校尉沙州牧燉煌公承制玉門以西寶寬雅有度量甚著威惠于西土在燉煌三年徙并州刺史薨謚宣公自高元年歲在庚子至為蒙遜所滅二十四年

北涼沮渠蒙遜

崔鴻十六國春秋北涼錄曰沮渠蒙遜臨松盧水胡人其先世為匈奴左沮渠遂以官為氏遜好學涉羣史雄烈有英畧後龍飛二年遜伯父羅仇麴粥從呂光征河

南光前軍大敗皆為呂光所殺宗部會葬者萬餘人遜
哭謂衆曰昔漢祚中微吾之乃祖翼獎實融保寧河右
呂王耄荒虐民無道豈可坐觀成敗不上繼先祖安民
之志下使二父有恨黃泉衆咸稱萬歲遂立盟約一旬
之間衆至萬餘與從兄男成推光建康太守段業為涼
州牧康公改龍飛二年為神璽元年業以遜為張掖太
守男成為鎮國大將軍委以軍國之任永安元年三月
遜以為業所憚內不自安請為安西太守四月業收男

成賜死遜聞男成死泣告衆曰男成忠于段公枉見屠害諸軍能為報仇乎成素有恩信衆皆憤泣而從之北至氐地衆踰一萬業遣右將軍田昂武衛將軍梁中庸等攻侯塢遜自氐地救之昂率騎五百歸遜軍遂大潰中庸來奔五月遜至張掖田昂兄子承愛斬關納遜業左右散走遜大呼曰鎮西何在軍人曰在此業曰孤單瓢一已為貴門所推可見乞餘命投身嶺南庶得東遷與妻子相見遜遂斬之六月右長史梁中庸等推遜為

大將軍涼州牧大赦改元永安四年秦遣鴻臚梁裴拜遜
鎮西大將軍開府儀同三司沙州牧西海公九年二月
兩月並出正始元年冬十月遷都姑臧十一月僭即河西
王位于謙光殿大赦改元始置百官如呂光為三河王
故事二年四月立子德政為世子三年二月與西秦通
和遜西巡遂循海至鹽池祀王母等寺中有玄石圖命
中書侍郎張穆為賦銘于寺前十四年起遊林堂于內
苑圖列古聖賢之像九月堂成遂讌羣臣談論經傳顧

謂郎中劉炳曰仲尼何如人也炳曰聖人也遜曰聖人者不凝滯于物而能與世推移畏于匡辱于陳伐樹削跡聖人固若是乎炳不能對遜曰卿知其外未知其內昔魯人有浮海而失津者至于亶州仲尼及七十二子遊于海中與魯人木杖令閉目乘之使歸告魯侯築城以備寇魯人出海投杖水中乃龍也具以狀告魯侯不信俄而有羣鷺數萬銜土培城魯侯信之大城曲阜訖而齊寇至攻魯不克而還此其所以稱聖也義和元年

十二月魏遣太常李慎拜遜太傅涼州牧涼王加九錫之禮三年夏四月遜寢疾立子茂虔為世子薨于路寢

五月葬元陵謚武宣王廟號太祖

沮渠茂虔

崔鴻十六國春秋北涼錄曰沮渠茂虔遜第三子聰穎好學和雅有度義和三年立為世子加中外都督大將軍錄尚書事遜薨僭即河西王位大赦改年為永和元年立子封彊為世子加撫軍大將軍錄尚書事三年五月

西中郎將燉煌太守沮渠唐兒上言曰十五日有一老父見于郡城東門投書忽然不見其書一紙八字滿之文曰涼王三十年若七年虔訪于奉常張慎慎曰昔號將亡神降于莘深願陛下克念脩政以副三十年之虔若盤于遊田荒于酒色臣恐七年將有大變虔不悅七年正月朝羣臣于謙光殿有狐在于東序門者不見其入左右以告命射之不獲二月端門崩初虔為酒泉太守起浮屠于中街有石象在焉是月象流血五月太廟基陷

六月當陽門崩魏常山王赤堅率衆至姑臧虔豐城拒
守九月面縛出降魏釋其縛徙虔及宮室士民十萬戶
于平城拜虔征西大將軍王如故八年賜死謚哀王自
遜永安元年歲在辛丑至是歲庚寅三年十九載

晉書曰蒙遜以安帝隆安元年自稱牧義熙八年僭立
俊八年而宋氏受禪以元嘉十年死時年六十六在位
三十二年子茂虔立六年為魏所滅

太平御覽卷一百二十四

欽定四庫全書

太平御覽卷一百二十五

宋 李昉等 撰

偏霸部九

後涼呂光

呂纂

呂隆

後燕慕容垂

慕容寶

慕容盛

慕容熙

慕容雲

後涼呂光

崔鴻十六國春秋後涼錄曰呂光字世明略陽氏人其先自沛遷略陽因家焉世為氐酋父婆樓字廣平佐命前秦官至太尉光以趙建武中生于枋頭夜有神光之異故名焉年十歲與諸兒童遊戲邑里為戰陣之法童兒咸推為主長而身長八尺四寸目重瞳子左肘有肉印沉毅凝重寬簡有大量人莫之知唯王猛異之曰此非常人

言之苻堅舉賢良除美陽令民夷憚愛隣境肅清遷鷹
揚將軍以功賜爵關內侯建元十九年以光為使持節
都督西討諸軍事率將軍姜飛彭晃杜進康盛等率步
騎七萬討西域十二月至龜茲龜茲王帛純捍命不降
光軍其城南五里為一營深渠高壘廣設疑兵為木人
被甲羅之壘上以為持久之計二十年五月帛純乃傾
國財寶請救于僕胡王遣弟吶龍侯將馗率騎二十餘
萬救之胡便弓馬善矛槊鎧如連鏃射不可入及以革

索為羈策馬擲人多有中者衆甚憚之從征諸將咸欲每營結陣按兵以拒諸胡光遽營相接陣為勾鑠之法精騎為遊軍彌縫其闕秋七月戰于城西大敗之帛純逃奔王侯降者三十餘國進入其城城有三重廣輪與長安城等城中塔廟千數帛純宮室壯麗煥若神居胡人奢侈富于生養家有蒲桃酒至千斛經十年不敗士卒淪沒酒藏者相繼諸國貢款屬路立帛純弟震為王以安之光撫寧西域威恩甚著泰以光為使持節散騎常

侍都督玉門巴西諸軍事安西將軍西域校尉進封順鄉侯
二十一年正月大饗文武博議進止衆咸請還光從之
三月引還以駝二萬餘頭致外國珍異千餘品駿馬萬
餘匹而還九月光入姑臧自領涼州刺史護羌校尉太
安元年苻丕以光為車騎大將軍涼州牧領護西域大
都督酒泉公光始聞苻堅為姚萇所害奮袂哀怒三軍
縞素大臨于城南傳檄諸州期孟冬大舉謚堅為文昭
皇帝十月大赦境內改建元為太安十一月羣寮勸進

曰長蛇未殄方掃清國難宜進位元台十二月上光為
侍中中外都督督隴右諸軍事大將軍涼州牧酒泉公三年
八月甘露降逍遙園白燕翔于酒泉衆燕成列而從之
麟嘉元年正月麟見金澤縣百獸從之于是羣寮奉請
崇進名號光從之二月僭即王位于南郊大赦改元置
官司丞郎以下猶攝州縣事三年九月大廟新成追尊
父為景昭王祖為宣公曾祖為恭公高祖為敬公龍飛
元年五龍見于浩亹羣臣咸共賀勸光稱號六月僭即

天王位于南郊大赦改年備置羣司立世子紹為太子
四年九月光寢疾十二月疾甚立太子紹為天王光自
號太上皇帝以子纂為太尉弘為司徒詔曰吾疾病不
濟吾終之後使纂統六軍弘管朝政汝恭已無為委重
二兄庶可以濟今外有強寇民心未寧汝兄弟輯睦貽
厥萬世若內相圖則禍不旋踵纂泣曰不敢有二心
薨葬高陵謚懿武皇帝廟號太祖

呂纂

崔鴻十六國春秋後涼錄曰呂纂字永緒光之長庶子母趙淑媛少便弓馬不好讀書太安元年至姑臧光臨薨執手戒之曰汝性麤武深爲吾憂聞基既難守成不易善輔永業勿聽讒言光薨紹祕不發喪纂排閣入哭盡哀而出紹懼以位讓之曰兄功高年長宜承大統纂曰臣雖長陛下國家之適不可以私愛而亂大倫驍騎呂超謂紹曰纂臨喪不哀步高視遠觀其舉止恐成大變宜早除之纂聞超謀遂率壯士數百踰北城攻廣夏門

入自青角門升謙光殿紹登紫閣自殺呂超出奔廣武
寨遂僭天王大赦改龍飛四年為咸寧元年謚紹隱王
纂遊田無度荒耽酒色常與左右因醉馳獵于坑澗之
間殿中侍御史王回扣馬諫不納番禾太守呂超擅伐
鮮卑思盤思盤訴超于纂纂召超入朝怒曰卿恃兄弟
桓桓欲欺吾也要當殺卿然後天下可定超頓首曰不
敢纂引諸臣宴于內殿呂隆屢勸纂酒已至昏醉乘步
輓車將超等遊于內至琨華堂東閣超取劍擊纂纂下

車擒超刺殺洞賊奔于宣德堂將軍魏益多入斬篡首以徇隆既篡位謚靈帝葬白石陵

呂隆

崔鴻十六國春秋後涼錄曰呂隆字永基光弟寶之子既殺纂遂僭即天王位大赦改咸寧三年為神鼎元年二月追尊父寶為文皇帝超有佐命之勲拜為侍中都督中外諸軍事輔國大將軍錄尚書封安定公二年秦遣鴻臚恒敦拜隆征北大將軍都督河西諸軍涼州牧建

康公三年隆以二涼之逼遣費珍寶請迎於秦秦遣尚書
左僕射齊難率步騎四萬來迎隆率戶一萬隨難東遷
既至長安秦以隆為散騎常侍尚書公如故超為安定
太守其後坐與姚興少子廣平公弼謀反誅呂光以乙
酉歲據涼州至是歲歲在癸卯凡一十九年

後燕慕容垂

崔鴻十六國春秋後燕錄曰慕容垂字道明號第五子
小字阿六敦母蘭淑儀垂少有器度長七尺七寸手垂

過膝銳甚寵之常曰此兒闊達好奇終能破人家或能成人家故名霸字道業因墜馬傷前二齒慕容雋即王位因改名缺外以慕郤缺為名內惡而改之尋以讖記之文去夬以垂為名及雋僭稱尊號封吳王建熙十年以車騎大將軍敗桓溫于枋頭威名大震太傅上庸王評深忌之垂遂出奔秦苻堅聞垂至大悅郊迎執手禮之甚重王猛惡垂雄畧勸堅殺之堅不從以為冠軍將軍封賓都侯歷京兆尹苻堅敗于淮南垂軍獨全堅以

千餘騎奔之世子寶言于垂曰國家傾喪皇綱廢弛當
隆中興之業建少康之功宜恭承皇天之意因而取之
垂曰彼懸心投命若何害之乃以兵屬垂垂至澠池言
于堅曰王師不利北境之民或因此輕重請奉詔輯寧
朔裔且龍鄴舊都陵廟所在乞過展拜以申固極堅許
之權翼諫曰垂爪牙名將今之韓白且世豪東夏志不
為人下頃以避禍歸誠非慕德而至恐冠軍之號不飽
其志列地百里未滿其心且垂猶鷹也飢則附人飽便

高飈遇風塵之會必有凌霄之志堅曰卿言是也但朕已許之匹夫猶重信况萬乘之主乎翼曰陛下重小信而忽社稷臣見其往不見其還關東之變垂其首乎垂自涼馬臺結草筏而渡至安陽修築于長樂公丕垂至館之于鄴西會苻暉告丁零翟斌聚衆四千謀逼洛陽丕于是配垂兵二千遣廣武將軍苻飛龍率氐騎一千為垂之副丕戒飛龍曰垂為三軍之統卿為謀垂之主苻暉告急簡書相尋垂方圖飛龍停河內不進恚誅氐兵

命左右殺飛龍濟河焚橋衆至三萬及洛陽苻暉閉關門拒守不與交通翟斌率衆會垂勸稱尊號垂曰新興侯國之正統孤之君也若以諸軍之力得平閻東當以大義喻秦奉迎反正誣上自尊非孤心也乃自稱大將軍燕王承制行事翟斌為建義將軍封河南王弟德為范陽王衆至二十萬濟自石門長驅攻鄴元年正月朝羣寮于清陽宮以暉在長安依晉愍帝在平陽中宗稱王改年建武故事改秦建元為燕元元年立太子寶為燕

太子攻拔鄴郛丕固守中城垂慙而圍之于魏郡肥鄉築新興城以置輜重進師攻鄴開其西奔之路二年三月丕棄鄴奔并州以魯陽王和為南中郎將鎮鄴十二年遷定都中山建興元年正月羣寮勸垂正尊號辛卯僭即皇帝位于南郊大赦改元建興立子寶為皇太子十一年五月太子寶率衆八萬伐魏范陽王德為之後繼魏聞寶將至徙于河西寶臨河不敢濟引師還次于參合俄而魏軍大至三軍奔清寶與德等數千騎奔免十一

年三月垂大眾出參合太子寶出天門垂至參合見積
骸如山設祭弔之死者父兄各皆號哭軍中哀慟垂慚憤
嘔血因而寢疾築燕昌城而還寶等至雲中聞垂疾皆
引歸及垂于平城夏四月薨于上谷之俎陽年七十二
謚武成皇帝廟號世祖

慕容寶

晉書曰以太元二十一年死在位十三年墓曰宣平陵

崔鴻十六國春秋後燕錄曰慕容寶字道祐垂第四子

元璽四年生于信都少輕果無志操好人從己段后諫
垂曰太子資質雍容柔而不斷非濟世之雄遠西高陽
陛下兒之賢者宜擇一樹之垂不納謂曰汝謂我為晉
獻公乎建興十一年四月僭即皇帝位大赦改元為永
康元年寶遣將軍趙王麟逼段后曰常謂主上不能嗣
守大統今竟能不宜早自裁以全段氏后怒曰汝兄弟
上逼殺母豈能保守社稷吾豈惜死念國滅不久遂自
殺八月立妃段氏為皇后濮陽公策為皇太子二年正

月魏使修和寶不許二月魏攻中山其夜尚書慕容皓
謀殺寶立趙王麟寶與太子策等萬騎就清河公會於薊
以開封公慕容詳守中山五月中山饑麟出據新市與魏
師戰于義臺敗績南奔魏入中山寶遣御史中丞兼鴻
臚魯遂持節授司空范陽王德亟相冀州牧承制南夏
封公封侯牧守三年二月寶發龍城以撫軍慕容騰為
前軍步騎三萬將南伐次于乙連長上段速骨宋赤眉
因民之憚遠役殺司空樂浪王宙衆既幸亂投仗奔走

寶馳還龍城又與長樂王咸等南奔尚書蘭汗殺速骨等十餘人奉太子策承制大赦遣迎寶及于薊寶欲北還咸等咸以汗忠款虛寶未明宜就范陽王德寶從之乃自薊而南四月寶至鄴鄴中遺民固請留之寶不從南至黎陽城西聞范陽王德稱制懼而退乃還龍城次于廣都蘭汗又遣左將軍稹超迎寶具申款誠忠節無差寶于是命發汗遣弟難率五百騎迎寶至龍城汗引寶入于外邸殺之年四十四殺太子策及王公卿士百餘

人汗自稱大將軍大單于昌黎王年號青龍七月長樂公咸
襲汗咸即位偽謚寶惠愍皇帝廟號烈祖

慕容咸

崔鴻十六國春秋後燕錄曰慕容咸字道運寶之庶長
子秦建元十年生于長安二十年苻堅誅慕容氏咸東
奔既至垂問以西事畫地成圖垂笑謂之曰昔魏撫明帝
之首遂乃侯之祖之愛孫有由來矣于是封長樂公建
興六年領北中郎鎮薊進爵為王及寶為蘭汗所殺咸

馳赴哀感潛結大衆謀討難及汗等斬之青龍元年七月告成宗廟大赦改元建平謙揖自卑不稱尊號以長樂王稱制諸王貶爵為公東陽公慕容根等九十八人上尊號咸不許十月根等又請咸許之丙子僭即皇帝位正月朝羣臣于承乾殿大赦改建平元年為長樂元年二年正月大赦咸去皇帝之號稱庶民天王三年八月右將軍慕容國謀率禁兵襲咸前將軍段璣等因衆心阻動潛于禁中鼓譟大呼咸聞變率左右出戰衆皆披

潰俄有一賊從閭中擊傷盛足取輦升前殿召叔公河間公熙囑以後事熙未至而薨年二十九偽謚昭武皇

帝廟號中宗

晉書曰盛幼而羈賤流漂長則遭家多難夷險安危備嘗之矣懲寶閭而不斷遂峻極威刑纖芥之嫌莫不裁之于未萌防之于未兆于是上下震恐人不自安雖忠誠親戚亦皆離貳舊臣靡不夷滅安忍無親所以卒于不免是歲隆安五年也

慕容熙

崔鴻十六國春秋後燕錄曰慕容熙字道文一名長生
垂之少子燕元二年生于長山建興八年封河間王永
康初隨寶奔龍城拜司隸校尉長樂元年遷僕射中外
都督領昌黎尹咸熒僭即皇帝位大赦改長樂三年為
光始元年二年正月熙引見州郡耆舊于宮問以民間
疾苦司隸部民劉瓉對問稱旨拜帶方太守是春大治
宮室至四月立苻貴人為昭儀五月築龍騰苑廣十里

餘役徒二萬起景雲山于苑內又起逍遙宮甘露殿連
房數百觀閣相交鑿天河渠引水入宮又為荷昭儀鑿
曲光海清涼池季夏暑熱士卒不得休息暒死者大半
四年二月昭儀苻氏卒立苻貴嬪為皇后九月苻后遊
畋熙從之北登白鹿山東過青嶺南臨滄海冬十一月
乃還百姓苦之卒為狼虎所害及凍死者五千餘人五
年十月擬鄴之鳳陽作弘光門累級三層建始元年正
月大赦天下三月太史丞梁延年夢月化為五白龍夢

中占之曰月臣也龍君也月化為龍當有臣為君寤而告人曰國符其將盡乎是月為苻后起承華殿高承光一倍負土於北門土與穀同價典軍杜靜載棺詣闕上書諫大怒斬之后嘗季夏思凍魚鱠冬須生地黃皆下有司切責不得加以大辟四月苻后崩熙悲號踰踊若喪考妣擁其尸而撫之曰體已就冷命遂斷矣于是僵仆氣絕久而乃蘇服斬縗食粥百寮于宮內設位哭臨使有司按檢哭者有淚以為忠孝無淚則加罪羣臣震懼莫

不舍辛以為淚高陽王妃張氏熙之嫂也美姿容熙欲
以為殉乃毀其襚鞬中有弊氈遂賜死三女叩頭求哀
熙弗許營陵周輪數里下固三泉內圖畫尚書八座之像
熙曰善為之朕將隨后入此陵輜車高大毀北門而出
中衛將軍馮跋左衛將軍張興先皆坐事亡奔以熙政
之虐也與跋從兄萬泥等二十二人結盟推夕陽公慕
容雲為主發尚方徒五千人分屯四門入宮授甲閉門
拒守中黃門趙洛生奔告熙熙曰此鼠盜耳朕還當誅

之乃收髮貫甲馳還赴難夜就城攻北門不克遂入龍騰苑左右潰散熙微服逃于林中為人執送雲等殺之年二十三雲葬之徽平陵謚曰昭文皇帝

晉書曰垂以孝武帝太元八年僭立至熙四世凡四年以安帝義熙二年滅

慕容雲

崔鴻十六國春秋後燕錄曰慕容雲字子雨寶之養子祖父高和高句麗之支庶自云高陽氏之苗裔故以高為

氏寶之為太子雲以武藝給侍東宮永康初拜侍御郎
以疾去官及熙葬后馮跋請之告以大謀雲懼跋等強
之四月即天王位復姓高氏大赦改建始元年為正始
元年國仍號大燕以馮跋為侍中都督中外諸軍錄尚
書事武邑公慕容歸為遼東公立燕之宗社三年冬十
月雲臨東堂幸臣離班桃仁懷劍執紙而入稱有所啓
抽劍擊雲雲以几拒班桃仁進而殺之立馮跋為主即
位偽謚為惠懿皇帝始垂以丙戌之歲建號中山至馮

跋之歲歲在己酉二十四年

太平御覽卷一百二十五